

# 佛说造塔功德经

唐中天竺三藏法师地婆诃罗奉敕译



南無本師釋迦牟尼佛

## 说 明

本简体校正版《佛说造塔功德经》电子书，根据《乾隆大藏经》大乘单译经，第 0519 部，唐中天竺三藏法师地婆诃罗奉敕译《佛说造塔功德经》原藏影印本校正，句读仅供参考。

本电子书是免费结缘品。特此说明。

仁慧草堂

二〇一八年八月



## 造塔功德经序

夫塔者，梵之称，译者谓之坟。或方或圆，厥制多绪，乍琢乍璞，文质异宜，并以封树遗灵，肩钤法藏，冀表河砂之德，庶酬尘劫之劳。岂伊弓剑衣冠，言申永慕；禹陵孔壁，用显緘藏而已哉？将有量等大千，覆三界而高梵世；取均菴果，偶枣叶而譬针锋。洪纤两途，福应无二；大小千计，净心终一。何只黄金白玉架迥争晖，火齐水精浮空竞彩。夕震<sup>1</sup>祥飙之响，入镂铎以流清；晨霏仙露之甘，上雕盘以凝泫。至乃位隆三果、勋重四禅，高升有顶之宫，行届无灾之地。斯教之弘旨也。

此经以永隆元年冬十一月十五日，请天竺法师地婆诃罗<sup>此言日照</sup>，与西明寺沙门圆测等五人，于弘福道场，奉诏宣译，至其年十二月八日终其文义。庶斯法宝周给大千，俾彼慧灯照融三界。云尔。

<sup>1</sup> 大正藏：振

## ● 起诵仪

### 香赞

(一遍)

炉香乍爇. 法界蒙薰. 诸佛海会悉遥闻. 随处结祥云. 诚意方殷. 诸佛现全身.

南無香云盖菩萨摩诃萨 (合掌三称)

南無本师释迦牟尼佛 (合掌三称)

### 开经偈

(一遍)

无上甚深微妙法 百千万劫难遭遇  
我今见闻得受持 愿解如来真实义

# 佛说造塔功德经

唐中天竺三藏法师地婆诃罗奉敕译<sup>2</sup>

如是我闻：

一时，佛在忉利天宫白玉座上，与大比丘大菩萨等，及彼天主无量众俱。

时，大梵天王、那罗延天、大自在天及五乾闥婆王等，各与眷属俱来至佛所，欲问如来造塔之法，及塔所生功德之量。

会中有菩萨，名观世音，知其意，即从座起，偏袒右肩，右膝着地，合掌向佛，而作是言：「世尊！今此诸天、乾闥婆等故来至此，欲请如来造塔之法，及塔所生功德之量。惟<sup>3</sup>愿世尊，为彼解说，利益一切无量众生！」

尔时，世尊告观世音菩萨言：「善男子，若此现在诸天众等，及未来世一切众生，随所在方未有塔处，能于其中，建立之者：其状高妙，出过三界，乃至至小如菴罗果；所有表刹上至梵天，乃至至小犹如针等；所有轮盖覆彼大千，乃至至小犹如枣叶。于彼塔内，藏掩如来所有舍利、发、

<sup>2</sup> 大正藏：大唐中天竺三藏法师地婆诃罗唐言日照译

<sup>3</sup> 大正藏：唯



牙、髭、爪，下至一分；或置如来所有法藏十二部经，下下至<sup>4</sup>于一四句偈。其人功德如彼梵天，命终之后，生于梵世，于彼寿尽，生五净居，与彼诸天等无有异。善男子，如我所说如是之事，是彼塔量功德因缘，汝诸天等应当修学！」

尔时，观世音菩萨复白佛言：「世尊！如向所说，安置舍利及以法藏，我已受持。不审如来四句之义，惟<sup>5</sup>愿为我分别演说！」

尔时，世尊说是偈言：

诸法因缘生 我说是因缘  
因缘尽故灭 我作如是说

「善男子，如是偈义名佛法身，汝当书写，置彼塔内。何以故？一切因缘及所生法，性空寂故，是故，我说名为法身。若有众生解了如是因缘之义，当知是人，即为见佛。」

尔时，观世音菩萨及彼诸天一切大众、乾闥婆等，闻佛所说，皆大欢喜，信受奉行。

佛说造塔功德经

<sup>4</sup> 大正藏：下至

<sup>5</sup> 大正藏：唯

## ● 结诵仪

### 补阙真言

(三遍)

南無喝啰怛那. 哆罗夜耶. 佉啰佉啰. 俱住俱住. 摩啰摩啰. 虎啰. 吽. 贺贺. 苏怛拿. 吽. 泼抹拿. 娑婆诃.

南無佛 南無法 南無僧 (合掌三称)

南無一切如来、应、正等觉 (合掌三称)

南無本师释迦牟尼佛 (合掌三称)

南無观世音菩萨摩诃萨 (合掌三称)

### 回向偈

(一遍)

诵经功德殊胜行 无边胜福皆回向  
普愿沉溺诸有情 速往无量光佛刹  
十方三世一切佛 一切菩萨摩诃萨  
摩诃般若波罗蜜

## 回向偈

(一遍)

愿以此功德 庄严佛净土  
上报四重恩 下济三途苦  
若有见闻者 悉发菩提心  
尽此一报身 同生极乐国

## 三皈依

(一遍)

自皈依佛，当愿众生，体解大道，发无上心。  
自皈依法，当愿众生，深入经藏，智慧如海。自  
皈依僧，当愿众生，统理大众，一切无碍，和南  
圣众。



此咒置经书中可灭误跨之罪



南无护法韦驮尊天菩萨

